

校補安南棄守本末

洪熙元年六月命行在都察院右副都御史弋謙為交
右布政使時交趾布政司威遜坐貪淫黷遂命謙代之
六月陞大理寺右寺丞陸禎為交趾布政司左叅議擢吏
孫子良為右叅議禎先從總兵官在交趾子良先任兵部
武選郎中有罪謫交趾統吏至是掌交趾布政司事兵部
尚書陳洽奏舉二人通達政體久在交趾諳知夷俗堪任
叅議遂有是命

七月命行在兵部右侍郎戴綸往交趾叅贊軍務賜綸勅
曰爾往交趾副尚書陳洽贊理榮昌伯軍務夫邊寄重任
爾以六卿之貳叅贊其間宜端謹勤密以稱任爾往欽哉

閏七月交陟巡按監察御史奏清化府賊首黎利聚衆作
逆圍茶籠州署州事土官知府琴彭拒守七月糧盡兵困
請發兵援之上覽之惻然勅叅將榮昌伯陳智等及交
趾三司曰朝廷命爾等鎮守交趾期在安輯一方今聞清
化賊首黎利等攻劫州縣邀截道路爾等近日乃奏已招
諭黎利待秋涼赴清化知府任今已秋矣利果曾到任否
朕度此賊譎詐必無歸順之心但詭詞緩師彼得從容聚
衆將來必為邊患爾等曾無慮及此乎署茶籠州事土官
知府琴彭被利攻圍七月芻糧垂盡兵死戰鬪三之一彭
能堅守拒敵交趾有人如此誠不易得爾等亦曾察此人

之忠發兵援之否勅至如察黎利果無歸嚮之心即設法
勦捕急發兵往援琴彭而厚撫之爾等皆國之大臣須同
心協力以副委任無患賞罰之不公也

閏七月追封交趾左叅政馮貴為左布政司右叅政侯保
為右布政司時尚書黃福言貴等皆奮力討賊戰死上
念方面之臣能捐軀效忠故有是命貴永樂中以兵科給
事中奉命從總兵官征交趾貴還言其地富實且產金珠
交趾賦金珠蓋啟於貴然貴明敏有理才凡所奏皆稱旨
且善用人嘗得土軍五百人勁勇善戰貴撫育甚厚每率
之討賊所嚮成功 五百人後為中官馬騏所奪貴與賊

戰不利遂及保皆死然貴貪侈在交趾得子女金帛甚富
貴死悉為豪猾所據保亦貪但和厚能勤其死也人頗惜
之

八月掌交趾布政司事兵部尚書陳洽滿九年當給由赴
部吏部以聞上曰洽以大臣鎮一方豈宜輕動命如黃
福例免來

八月交趾叅將榮昌伯陳智等奏叛寇路文律潘僚陳文
阮幸及阮光烈胡綱阮子驥阮汝賢陳江陳清陳元忠胡
將并軍民人等咸言願改過自新請降勅撫諭上以奏
示侍臣曰蠻夷之人叛服不常從古而然不足恠若勞兵

黷武亦非帝王盛德事不若因其所陳而赦之亦稍紓官
民之勞遂勅文律等曰爾等本皆良善但因所司撫綏失
當以致逃竄山林聚衆拒命原其初心實非得已而父子
夫婦兄弟分離隔越不得寧居疾病死亡不能相保歷年
既久艱苦備嘗有可憐憫今朕統承大位主宰萬方薄海
內外皆朕赤子罪無大小悉以赦除今總兵者言爾等有
悔過心朕用嘉之特遣人賫勅往諭爾等如誠心遷善即
各還本土先有官者悉赴總兵處其自陳其名奏來授以
職事仍前任用係民人者官給種子農具蠲免賦役五年
前之過失譬如寒冷冰遇春消釋淨盡無復渣滓朕之此

言上通 天地爾等更勿懷疑因循不決失此事機後悔
無及仍勅智等若其來歸宜善撫綏

十二月總交趾布政司按察司事兵部尚書陳洽奏賊首
黎利名雖求降實則攜貳招聚逆黨拒抗官兵攻圍茶籠
州殺知府琴彭潛結玉麻州土官琴貴及老撾酋長與之
同惡太監山壽賁勅宥利之罪授清化府知府利言俟秋
涼到任今復言素與叅政梁汝笏等有怨乞解知府之職
願得署茶籠州事近演州土人多有從利為逆而利又遣
其黨潘僚路文律等往嘉興廣威等州招集逆徒日以滋
蔓望勅總兵者早滅此賊以靖邊方 上覽奏勅榮昌伯

陳智安平伯李安都督方政及交趾三司曰反賊黎利色藏禍心已非一日始若取之易如拾芥乃信庸人之言惟事招撫延今八年終不聽命養成猖獗之勢使忠臣無辜而罹害良民被毒而未厭其誰之過勅至陳智方政專督進兵務在協和成功不許緩稽誤事若來春捷報不至責有所歸

十二月 上御文華殿召楊士奇楊榮問曰昨日諭榮昌伯等 勅皆行矣對曰已行 上曰朕有一言懷之久矣今獨與卿二人說未可輕泄也昔在南京 皇考因交趾擒叛賊至曾與朕言 太祖皇帝初定天下四裔惟安南

最先歸化後來黎氏篡陳氏而奪其位所當必討而是時
求陳氏之後立之不得故郡縣其地果若陳氏今尚有後
選擇立之猶是太祖之心而一方亦得安靜朕對曰朝
廷若行此事誠帝王之盛舉皇考笑曰此語未可輕泄
然藏在朕心未嘗忘朕今思之若陳氏果有後選一人立
之使其藩臣之職三年一貢如洪武之制用寧其民而中
國亦省兵戍之勞豈不可乎如此不免論者謂朕委棄
祖宗之業然繼絕興滅實我皇祖之志士奇榮對曰永
樂三年初命將征黎賊凡詔勅文字皆臣等在御前親
承面命書行是時太宗皇帝聖志惓惓在於興滅繼絕

玉音具存中外所共聞知 上曰其時朕雖髫年尚記一
二聖語亦如卿等所云卿二人但識朕意勿言三二年内
朕必行之遂賜酒饌而退

宣德元年三月命總兵官太傅黔國公沐晟督寧遠州土官知州刁吉罕等捕寧遠州賊叅將榮昌伯陳智等招捕交趾宣化太原等府賊時掌交趾都司事都督陳濬等奏交趾宣化嘉興等府賊首周莊等糾合雲南寧遠州紅衣賊長擎等刼殺人民燒毀州縣廨宇又太原等府歸化等州縣賊黃奄等聚衆為盜并芙蓉縣賊潘可利亦從賊首黎利刼掠蓋太原宣化二府屬縣鄰近雲南寧遠州其人皆紅衣黑胷故號紅衣賊土官知州刁吉罕縱令刼掠官軍討之則遁入山林軍回復出行刼請兵討之故有是命三月交趾總兵官榮昌伯陳智都督方政討叛寇黎利進

至茶籠州敗績蓋政勇智怯素不相能內官山壽專志招撫而擁兵不救至是遂敗尚書陳洽以聞上遣勅切責智與政曰叛賊黎利本一小醜如早能盡心掩捕如拾芥耳乃安坐不慮養寇遺患今聞率兵至可留闕及茶籠州兩遭挫辱皆緣爾等平日私意忿爭兩不相下是以臨事之際勇者獨往而無謀懦者畏縮而不助安能成功論罪豈可寬貸今姑優容宜晝夜同心同力練兵蓄銳務滅此賊以贖前罪責壽曰叛賊黎利本一窮蹙小寇若早用心擒捕如探雀雛爾乃妄執己見再三陳奏惟事招撫以致養禍遺患及方政等進討爾擁官軍一千餘人坐守又安

不往來策應遂致悞事爾罪豈可容乎宜深思改悔盡心奮力協助政等共圖後効勅洽曰陳智方政皆庸才智懦而多忌政勇而寡謀加以私意相競不相和協再至於敗今姑優容之使圖後効用贖前罪爾宜盡心力贊輔俾其同心以平此寇古語云危而不持焉用彼相爾宜勉之

三月贈乂安知府琴彭為交趾布政使司左布政司遣官賜祭勅交趾布政使司曰故知府琴彭恪恭朝命堅持臣節畢力抗賊死不易心忠義之誠明如皦日朕懷惻惻夙夜不忘今特贈為交趾布政司左布政司勅至即厚恤其家仍遣人護送其子一人來京官之彭交趾人擢知乂安

府守茶籠州民懷其惠及叛寇攻城晝夜備禦臣節彌厲糧盡援絕不屈而死事聞故有是命

三月辛亥上諭行在吏部尚書蹇義曰交趾叛寇黎利潘僚殺害忠良盜據州寨凡官吏軍民有被迫脇不得已從逆及有曾與黎利等同謀受其委任者今能悔過遷善或率衆來附或挺身自歸悉宥其罪復其職役其中有能盡心朝廷出力報効及交趾土人有能奮建功績者皆量其功能授之以官可編置勘合一千道付總兵官及尚書陳洽掌之俾驗績除授

四月乙丑命太子太保成山侯王通佩征夷將軍印充總

兵官都督馬瑛充叅將往交趾征勦叛寇撫安軍民仍命
尚書陳洽叅贊軍務

四月 上視朝罷御文華殿蹇義夏原吉楊士奇楊榮四
人侍 上曰 太祖皇帝祖訓有云四方諸夷及南蠻小
國限山隔海僻在一隅得其地不足供給得其民不足使
令又云若其自不忖量來撓我邊彼為不祥彼不為中國
患而我興兵伐之亦不祥也吾恐後世子孫倚中國富疆
貪一時戰功無故興兵傷人切記不可後因黎氏弑其國
主毒害國人 太宗皇帝不得已有弔伐之師初意但討
平黎賊之後即求前王子孫立之蓋興滅繼絕之盛心也

而前王子孫為黎賊戮已盡乃徇土人之情建郡縣置官
守非出 太宗皇帝本心自是以來交趾無歲不用兵一
方生靈遭殺已多中國之人亦疲於奔走甚矣 皇考嘗
念及之深為隱惻故即位之詔施恩於彼特厚昨日遣將
出師朕通夕不寧誠不忍生靈之無辜也反覆思之只欲
如洪武中及永樂初使自為一國歲奉常貢以全一方民
命亦以休息中土之人如何義等皆未有對 上曰此固
不背 祖宗之心義原吉對曰 太宗皇帝平定北方勞
費多矣今小醜作孽何患不克若以二十年之勤力一旦
棄之豈不上損威望願更思之 上顧士奇榮曰於卿兩